

REGIONAL NEWS

HEADLINES:-

1. Mizorama Myanmar raltlan awmte mit naute thlalak leh kutzia chhinchhiahna (biometric data) khawn khawm hna tan thei turin ruahmanna siam mek a ni.
2. Kumin March ni 20 a Mizoramah African Swine Fever (ASF) vawk pulhri a leng leh tan tih finfiah atanga tun thlengin vawk 4,000 a thi tawh.
3. Hyderabad khawpuia tukina inchhawng pakhata kangmei nasa tak chhuakah mi 17 an thi.
4. Union Home Minister Amit Shah-a'n Ayushman Bharat Scheme chhawrtu mi vbch 60 an awm mek tih a sawi.

<><><>

BIOMETRIC IDENTIFICATION

Mizorama Myanmar raltlan awmte mit naute thlalak leh kutzia chhinchhiahna (biometric data) khawn khawm hna tan thei turin ruahmanna siam mek a ni.

Home department hotute hnen atanga thu dawn danin kar kalta Zirtawpni khan ministry of home affairs (MHA) thuneitute nen hemi chungchang hi biakhmuhtheih kaltlangin sawiho a ni a. Ruahmanna lo siam lawk tawhte a taka kalpui tura inbuatsaih mek zel a ni a, bul tan theih thuai tum a ni. Home department hotute chuan Myanmar ram tlanhhiatsana Mizorama awm mekte biometric enrolment kalpui tur hian sorkar laipui chuan MNF sorkar hun lai atang tawh khan an rawn nawr tawh a. Mahse, online portal a a khawnkhawm dan tur an rawn dah chu an rama thawnkir turte tana duan a nih vangin Mizoram sorkar chuan siamtha turin MHA lamah an vawm thla leh a. Tun hnu a an rawn siamthat leh tak hnu-ah ruahmanna hi a thara kalpui a ni leh ta a. Tunah hian engkim peihfel tawh a nih avangin raltlante biometric data lakkhawm hna hi thawh theih thuai tura an ngaih thu home department hotute chuan an sawi a ni.

Kum 2021 March thla chawhma lam atanga an ram chhuahsan a Mizorama rawn lut Myanmar raltlante hi tun dinhmunah 33,023 an awm mek niin sorkar chuan a chhinchhiah a. An zinga mi 17,551 te chu raltlan dahkhawmna hmun 125-ah an awm a, mi 15,472 te erawh chuan an chhungkhat lainate leh thiante an belh loh pawhin mi in luahin an inhlawhfakna hmunah an khawsa a. Raltlan awm mek zinga 12,361 te hi naupang an ni a, mi 10,416 chu hmeichhia niin mi 10,246 te chu mipa an ni. Champhai district-in Myanmar raltlan a mikhual hnem ber a, raltlan 13,586 zetin an cham chilh a. A dawtah Lawngtlai district-in mi 6,017 mikhualin Siaha district-ah 4,976 an awm a, Aizawl district-ah pawh 3,716 awmin an awm tlem berna Kolasib district-ah erawh chuan mi 129 chauh an awm a ni.

He tih lai hian home department hotute chuan Bangladesh atanga raltlan Mizoram a awm mek mi 2,000 chuangte chungchang chu an hriat rih loh thu an sawi a. Biometric enrolment khawn a nih ve tur leh tur loh chu Myanmar raltlante endik zawh lamah sorkar laipui thu ang anga kal pui a ni dawn niin an sawi a ni.

<><><>

DEPORTATION

Champhai khawpui veng pahniha hnawksak zawnga che Myanmar raltlan ni a hriatte chu YMA-in hrengin Police-in ramri-ah hel pawl Chin National Army (CNA) kutah an hlan.

Champhai YMA sub headquarters hruaitute hnen atanga thudawn danin raltlan nia hriat, Lalneihchhunga ti a hriat bawk Bawineisuma chu, "Mipui sipai ka ni," tiin chem nen khawlaiah a inhrosa a, pawl khawih thei nia an hriat avangin Dinthar YMA-in an khuahkhirh a, Police kutah an hlan a. Bawineisuma hi mipui sipai ni awm taka kawr rang ha fo thin ni a sawi a ni. Hei bakah hian New Champhai YMA hruaitute chuan Myanmar mi, raltlan ni a hriat - Vanlalrinchhana, Bawihliana, Siangthachhung, K.D. Liana, Vanbawiha leh Sangbawihthang te chu thlama ualau taka zu an in avang leh CNA sipai chawl mek ni a inchhal a an pawr hle avangin an hreng a. Anni 7 hi Police hnenah hlanin Police te chuan Myanmar ramri lamah hruai-in CNA thuneitute hnenah an hlan ani.

<><><>

MAMIT LEADERS

Mamit Chhim Veng khawtlang chuan an veng vohbik naupang Lalremruata (kum 11) rawng taka thattu a puh R. Lalrinchhana chu an veng chhuahsan turin an ti.

Mamit Chhim Veng VC leh pawl hrang hrangte chuan kum 2023 August 17, a vohbik naupang kum tling lo, Lalremruata rawng taka thattu ni a hriat R. Lalrinchhana chungchangah nimin tuk khan VC House-ah inkhawm an ko a. R. Lalrinchhana hian an veng chhung a rawn rap leh tih hria-in an thinrim hle a Inrinni la la a an veng chhuahsan nghal turin an ti a. Mamit Chhim Veng VC leh tlawmngai pawlte chuan R Lalrinchhana'n Chhim Veng a rawn rap leh a nih chuan a chungah leh a chhungte chungah pawh engpawh thleng se, an cho chhuah a ni ang, an ti a ni. Mamit a kan Corr sawi danin Lalrinchhana hi nimin vek khan a chhungte'n Mamit atangin an phur chhuak leh nghal a ni.

He tualthihna chungchangah hian kum 2023 August ni 29 khan Mamit Chhim veng khawtlangin kawng an zawh a. Khami tuma mipui kalkhawm thuchhuah kha khauh taka kengkawh an tum thu Mamit Chhim Veng VC leh tlawmngai pawlte chuan nimina an kalkhawmna-ah an sawi nawn leh a. R. Lalrinchhana hian an veng chhuahsan nghal tur a ni, an ti nawn leh a ni.

Thu dawn danin R Lalrinchhana hi Mamit Dist. Jail atangin Central Jail ah sawn a ni a, tun hnai-ah dam loh chhuan lamin bail a dil anga bail a chhuah a ni. Mamit Chhim Veng khawtlang chuan Lalremruata a thah chhan ni a R. Lalrinchhana sawi danah an lungawi loh thu an sawi a, thudik tak chhui chhuak tur leh dan anga na taka hrem an phut a. Amah chauh lo hi vohbik naupang tualthihna-ah thurualpui a neih ngei an rin thu leh chhui chhuah ngei an phut thu an sawi bawk a ni.

<><><>

ASF

Kumin March ni 20 a Mizoramah African Swine Fever (ASF) vawk pulhri a leng leh tan tih finfiah atanga tun thlengin vawk 4,000 a thi tawh.

Animal husbandry & veterinary department hotute sawi danin vawiin khan Siaha khawpui a veng 4-ah vawk pulhri avangin vawk 12 a thi leh a. Vawiinah hian vawk hri darh zel tur venna atana vawk suat a awm lo thung. Mizorama district 3 hmunpui, Siaha, Lawngtlai leh Mamit district-a Zawlnuam khua-a veng 54-te chu ASF vawk pulhri lenna-ah puan a ni tawh a. Siaha khawpui-a veng 29-ah vawk 2,417 a thi tawh a, Lawngtlai khawpui-a veng 17-ah vawk 1,436 thi tawh bawkin Zawlnuam khua-a veng 3-ah vawk 173 leh Lunglei khawpui a veng 5-ah vawk 74 a thi tawh bawk a ni. Vawk pulhri darh zel tur venna atana vawk suat tawh zat hi 1,236 a tling tawh a. Siaha khawpui-ah vawk 775 suat tawhin Lawngtlai-ah vawk 359 ,Lunglei khawpui-ah 54 ,Zawlnuam khua-ah 48 suat a ni tawh bawk a ni.

Kumin March thla laihawl vel atang khan Lawngtlai khawpui leh Mamit district a Zawlnuam khua-ah vawk thi leh damlo engemaw zat report a awm leh avangin vawk thi leh damlo sample te la-in endik a ni a. March ni 20 khan Guwahati a laboratory chuan African Swine Fever vawk pulhri vang a ni tih a rawn nemngnet a ni.

<><><>

FAMILY SUNDAY

Mizoram Baptist Kohhran leh Chhandamna Sipai Pawl chuan vawiin hian Kristian Chhungkaw pualin hun an hmang.

Baptist Kohhran chuan "Kristian Chhungkaw Ni" hi urhsun takin an hmang a. BCM tualchhung Kohhran hrang hrangte chuan chawhma Pathian Biak inkhawmah 'Mahni Chhungte Ngaihsak' tih thupui hmangin Pathian thuchah an ngaithla a. Zan lamah pawh Kristian Chhungkaw ni pual hian kohhrante'n hun an hman chhunzawm leh dawn a ni. 'Kristian Chhungkaw Ni' hi BCM Calendar-ah chuan ni pawimawh tak niin kum tin May thla Pathianni vawi-3 na-ah hman thin a ni.

Salvation Army, India Eastern Territory pawhin vawiin hian 'Kristian Chhungkaw Campaign Sunday' hun an hmang a, Corps hrang hrangte chuan he ni pual hian Thianghlimna Inkhawmah hun an hmang a. Zan sInkhawm lamah pawh Corps thenkhat chuan he ni pual hian hun an la hman chhunzawm ang. Territorial Headquarters chuan Territory pumah Kristian Chhungkaw Campaign thupuih 'Chhungkua-ah bul i tan ang u' tih a hmang a. He thupui hmang hian Thianghlimna Inkhawmah Corps hrang hrang chuan Pathian thuchah an ngaithla a ni. Territorial headquarters officer-te chuan he ni pual hian Aizawl khawpui chhung Corps thenkhatah hun an hmang bawk a ni.

<><><>

LAND GIFT

Aizawl Kulikawn venga cheng Pu Vanlalngaia’n Hlimen Chuhvela a ram bigha 7 point 5 a zau chu Synod kutah a hlan.

Ram inhlanna hun hi Pu Vanlalngaia in, Kulikawnah buatsaih a ni a. Mizoram Presbyterian kohhran Synod Executive Secretary Rev. Dr. Rosiamliana Tochhawng in he hun hi a kaihruai a, ram neitu Pu Vanlalngaia’n a ram chu Synod kuta hlan a duh chhan sawiin Pathian hnenah a kum a pawhseisak chu tangkai taka hmang tura a dil ve thin thu a sawi a. Chu’ng zingah chuan Mizo thalai a sing tel teh meuh Setana’n an taksa leh an thlarau tihlum a, hremhmuna a hruai lut tur chu chhanchhuahna beihpui thlak a ngai tak taka a hriat thu leh, kohhranin hemi kawnga hma la se a lo tih rilruk ve thu a sawi a ni.

Ram inhlanna lehkhaah hian ram neitu Pu Vanlalngaia leh Senior Executive Secretary Rev. V.L. Luaia Hranleh ten hming an ziak a, hriatpuitu atan Executive Secretary Rev. Dr. Rosiamliana Tochhawng leh Upa K. Zoremsanga, Kulikawn ten hming an ziak baw a. Pu Vanlalngaia chuan thlarau bo pahnih/khat tal chhanchhuaha an lo awm theih na’n tiin Rev. V.L. Luaia Hranleh hnenah ram pekna lehkha hi a hlan a ni. He hunah hian Rev. Lalhleia, Director, Synod Prison Ministrypawh a tel ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HYDERABAD FIRE

Hyderabad khawpuia tukina Gulzar House bul building-a kangmei nasa tak chhuakah mi 17 an thi a, midang engemawzatin hliam an tuar bawk. Thi zingah hian kum 7 hnuai lam naupang 8 leh hmeichhia 6 an tel a, hliamte hi damdawi in hrang hrangah enkawl an ni.

Kangmei hi chhawng hnuai ber atanga chhuak tanin a chung chhawng 2 a kang kai a, kangthelhtu-ten mi 17 an chhan chhuak thei a ni. Kangmei chhuah chhan chiahi hriat la ni lo mahse chhuina hmasaah chuan electric current kal sual vang nia hriat anih thu Director General of Police, Dr. Jitendar-a’n a sawi.

Prime Minister Narendra Modi-a chuan vanduaiaa thleng chu pawia tih tak zet thu sawiin thi chhungte tawrhpuia a hlan a, thi chhungte hnenah zangnadawmna cheng nuai 2 theuh pek an nih tur thu leh hliam tuarte hnenah cheng sing 5 theuh pek an nih tur thu a sawi bawk. Telangana Deputy Chief Minister Bhatti Vikramarka pawhin thi chhungte chu cheng nuai 5 theuha ral an nih tur thu a puang a ni.

<><><>

UNION HOME MINISTER ON AYUSHMAN BHARAT

Union Home Minister Amit Shah-a’n kum 10 kalta chhung khan Narendra Modi-a sorkar chuan scheme hrang hrang kal tlangin health sector-ah danglamna nasa tak a thlen a ni, a ti.

Gujarat Mehsana Dist hnuai Gozaria-a vawiina KK Patel & Madhuben K Patel Nursing College building sak thar a hawna-ah he thu hi sawiin ram khua leh tui vbch 60-in Ayushman Bharat Scheme an chhawr tangkai mek a ni, a ti a, kum 10 kalta chhung vek khan AIIMS 7 awm thin chu 24-ah a pung chho tih a sawi bawk.

<><><>

MEGHALAYA TO INCREASE MED SEATS

Meghalaya sorkar chuan kum 2 lo awm tur chhungin medical seat 450 siam belh a tum tih state Chief Minister Conrad K. Sangma-a’n a sawi a, tun dinhmunah central quota hnuai an state chhung zirlaite tan medical seat 100 a awm mek a ni.

Pu Sangma chuan Shillong Medical College-ah kumin atangin MBBS zirna kalpui tan a ni dawn tih pawh sawiin Tura Medical College-ah pawh nakum atangin MBBS zirna tan theih beisei a ni, a ti a, University of Science & Technology Meghalaya-a PA Sangma International Medical College & Hospital-ah chuan MBBS zirna tan a ni tawh a ni, a ti a, heng institute 3-a seat 100 atanga 150 awm bakah central quota hnuai seat 100 vel awm nen, an state chhung zirlaite tana medical seat awm thei zat chu 550 velah a pung chho dawn a ni, a ti bawk.

<><><>